

Ze sium di M. Gioitti

*Gnoz, senze sium
passadis a sgragnelà il rosari
dai ricuarz, a disberdeà
ideis ìngropadis,
cui vói spalancâz tal vieri
a fissa lis starlupulis
che slùsin come lusignis tal scûr.
Gnoz passadis a sintî
il roseâ dal carul tal len,
il pocâ dispetôs dal cûr
a spietâ che filtri pa fissuris
la prime lûs dal dì.
La prime lûs livide e crude
che nus fâs indurmidî
sfîniûz e macolâz
da cavalcade traviars lis stradis
da nestre vite passade.*
